

समा - 12:25 hrs.

<><><><><><>

Terrorist Killed

बांडीपोरा जिले च फौज नै गुरेज सैक्टर च नियंत्रण रेखा पर घुसपैठ दी कोश्ट करा रदे दंड आतंकवादियें गी मारी मकाया ऐ। फौज नै अज्ज जानकारी दिती ऐ जे बन्ने पारा घुसपैठ दी शेंका बारे थहोई दी इक सूह दी बिनाह पर कारवाई करदे होई फौज ते जम्मू-कश्मीर पुलसै इक सांझा अभियान शुरु कीता। फौज दी श्रीनगर स्थित चिनार कोर नै अपने सोशल मीडिया हैंडल एक्स पर लिखेया ऐ जे घुसपैठ करने दी कोश्ट करै करदे आतंकवादियें गी दिक्खने पर उत्थे तैनात सौहगे जवानें उनेंगी ललकारेया जेहदे पर रुकने दी बजाय घुसपैठियें फैर खोली दिता। जवाबी कारवाई च दंड आतंकवादियें गी ढेर करी दिता गया। खीरी जानकारी थहोने तगर कारवाई अजे जारी ही। होर ब्योरें गी बलगेया जा रदा ऐ।

<><><><><><>

Traffic Advisory

इक जरुरी इतलाह जम्मू-श्रीनगर राष्ट्रीय जरनैली सिड़क NH-44 पर गड़डियें दी आओ-जाई लेई अजे बी पूरी चाली बंद ऐ। नगरोंटा दे अग्गे रियासी, चनैनी, पत्नीटॉप, डोडा, रामबन, बनिहाल ते श्रीनगर आहली बक्खी जाने दी कुसै गी बी इजाजत नैही ऐ।

<><><><><><>

LG Rescue Ops

उपराज्यपाल मनोज सिन्हा होरें इक उच्ची सतह दी बैठक लाइयै जारी राहत ते बचाव कम्में दा जायजा लैता। उनें लगातार होई दी बरखा ते हाइ जनेह हालात कन्नै निबड़ने लेई सेना, वायु सेना, NDRF, केन्द्रीय सशस्त्र पुलस बल आस्सेयी कीती गेदी तयारियें दा जायजा लैता। एल.जी होरें अफसरें गी आक्खेया जे ओह सारी जरुरी सेवाएं दी मरम्मत ते इंदी फौरी बहाली लेई कम्म करन। उनें सिड़कें, पुलें ते राष्ट्रीय जरनैली सिड़कें दी फौरी मरम्मत पर बल दिता

ते पानी करी पैदा होने आहली बमारियें कन्नै निबड़ने लेई अस्पतालें गी बी तयार रौहने लेई आक्खेया। एल.जी होरें PDD गी NHPC ते Power Grid Corporation of India Ltd. कन्नै रलियें बिजली ढांचे गी ब्हाल करने आस्तै आक्खेया।

<><><><><><>

CM Relief & Restoration

मुख्यमंत्री उमर अब्दुल्ला होरें आक्खेया ऐ जे लगातार बरखा करी हाड़ आहले हालात बने ते इस करी नुकसान होआ। उआ उनें आक्खेया जे मौसम बारे पैहले सोयां भविक्खवाणी बी कीती गेदी ही। इस गल्ला पर जोर पांद होई जे उन्दी सरकार दी प्राथमिकता इसलै फौरी तौर पर राहत ते बचाव कम्म ते पुर्नबहाली ऐ, उनें आक्खेया जे कम्मै लेई समें-सीमा ते जवाबदेई बी तय कीती जानी चाहिदी। जम्मू दे सिविल सचिवालय च लग्गी दी उच्ची सतह दी बैठक च मुख्यमंत्री होरें बरखें करी जम्मू-कश्मीर च होए दे नुकसान दा जायजा लैता। उनें हिदायत कीती जे नुकसान दा फौरी आकलन करने मगरा केन्द्र दी मदद कन्नै प्रभावितें गी राहत आस्तै माली पैकेज दिता जा।

<><><><><><>

CM Ex-Gratia

मुख्यमंत्री उमर अब्दुल्ला होरें श्री माता वैष्णो देवी यात्रा दे रस्ते च अद्दकुवारी थाहर लास-पस्सियां पौने आहली घटना च मारे गेदे लोकें दे नेड़में रिश्तेदारें लेई 6 लक्ख रपे दी सींधी सहायता देने दी घोषणा कीती ऐ। प्रदेश आपदा राहत कोष थवां 4-4 लक्ख रपे ते मुख्यमंत्री राहत कोष थमां 2-2 लक्ख रपे दिते जागंन। उनें हाड़ें करी पीड़ित लोकें गी राहत-सहायता देने दी बी घोषणा कीती। उनें आक्खेया जे SDRF थवां बी मुआवजा दिता जाग ते मुख्यमंत्री राहत कोष थवां 2-2 लक्ख रपे दिते जागंन। मुख्यमंत्री होरें इनें घटनाएं च मामूली जां गंभीर तौर पर जखिमयें गी बी राहत-सहायता देने दी गल्ल आक्खी। उनें फौरी खर्चें लेई प्रदेश दे सारे प्रभावित जिले दे डिप्टी कमीशनरें गी 10-10 करोड़ रपे पेशगी जारी करने लेई गलाया।

<><><><><><>

Satish Post -Floods Review

ट्रांसपोर्ट मंत्री सतीश शर्मा होरें जम्मू-कश्मीर च हाई मगरा दी स्थिति दा जायजा लैने लेई इक बैठक लाई। एदे च बक्ख-बक्ख मैहकमे दे आला अफसर शामिल होए। बैठक दौरान मंत्री होरें हाइ प्रभावित लोकें दियें समस्याएं दे हल लेई तरीकाकार अपनाने लेई गलाया। उनें अफसरें गी आक्खेया जे ओह पूरी तनदेई कन्ने कम्म करन। मंत्री होरें बक्ख-बक्ख मैहकमे दे अफसरें गी आपूं-चे तालमेल बनाइयै कम्म करने लेई आक्खेया, तां जे प्रभावित लोकें दी सेई चाली मदद होई सकै ते उन्दी बाआबादकारी खरी चाली यकीनी बनी सकै।

<><><><><><>

Leaves Canceled

जम्मू-कश्मीर सरकार नै मौजूदा हालात गी दिक्खदे होई सारे कर्मचारियें दी छुट्टियें गी रद्द करी दिता ऐ। आम प्रशासनिक मैहकमे नै सारे प्रशासनिक सचिवें ते मैहकमे दे प्रमुखें गी हिदायत कीती ऐ जे ओ बड़ी मती मजबूरी आली स्थिति गी छोड़ियै, कुसै बी चाली दी होर छुट्टी गी मंजूर नैई करन।

<><><><><><>

PM-MKB

प्रधानमंत्री नरेन्द्र मोदी होर 31 अगस्त ऐतवार दिनें 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्ने अपने बचार सांझे करडन। एह इस कार्यक्रम दी 125मीं किश्त होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुं’दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>